

心熟同歸於定滅若自然疾雷破山而不驚白刃交前而不懼
視名利如過隙知生死如漬癰故知用志不分乃疑於神心之
虛妙不可思也夫心之爲物也卽體非有隨用非無不馳而速
不召而至怒則玄石飲羽怨則朱夏隕霜縱惡則九幽匪遙積
善則三清何遠忽來忽往動寂不能名時可時否耆龜莫能測
其爲調御豈鹿馬比其難乎太上老君運常善以度人昇靈臺
而演妙略三乘之因果廣萬有之自然漸之以日損有爲頓之
以證歸無學喻則張弓鑿矢法則挫銳解紛修之有常習以成
性黜聰隳體嗒然坐忘不動於寂幾微入照履殊方者了義無
日遊斯道者觀妙可期力少功多要矣妙矣

道藏輯要

坐忘論

巽

上昂集五
卷上

得道七

夫道者神異之物靈而有性虛而無象隨迎不測影響莫求不
知所以然而然通生無匱謂之道至聖得之於古妙法傳之於
今循名究理全然有實上士純信克己勤行虚心谷神唯道來
集道有深力徐易形神形隨道通與神合一謂之神人神性虛
融體無變滅形與道同故無生死隱則形同於神顯則神同於
氣所以蹈水火而無害對日月而無影存亡在已出入無門身
爲滓質猶至虛妙况其靈智益深益遠乎生神經云身神並一
則爲真身又西昇經云形神合同故能長久然虛無之道力有
淺深深則兼被於形淺則唯及於心被形者神人也及心者但

得慧覺而身不免謝何耶慧是心用用多則心勞初得少慧悅而多辯神氣漏洩無靈潤身光遂致早終道故難備經云尸解此之謂也是故大人含光藏輝以期全備凝神寶氣學道無心神與道合謂之得道經云同於道者道亦得之又云古之所以貴此道者何不日求以得有罪以免邪山有玉草木以之不彫人懷道形骸以之永固資薰日久變質同神鍊形入微與道冥一散一身爲萬法混萬法爲一身智照無邊形超靡極總色空而爲用舍造化以成功真應無方其惟道德西昇經云與天同心而無知與道同身而無體然後天道盛矣謂證得其極者也又云神不出身與道同久且身與道同則無時而不存心與道同則無法而不通耳與道同則無聲而不聞眼與道同則無色而不見六根洞達良由於此近代常流識不及遠唯聞捨形之道未達卽身之妙無慙已短有効人非其猶夏蟲不信冰霜醯雞斷無天地其愚不可及何可誨焉

坐忘樞翼

夫欲修道成真先去邪僻之行外事都絕無以干心然後端坐內觀正覺覺一念起卽須除滅隨起隨制務令安靜其次雖非的有貪著浮遊亂想亦盡滅除晝夜勤行須臾不替唯滅動心不滅照心但冥虛心不冥有心不依一物而心常住此法玄妙利益甚深自非夙有道緣信心無二者莫能信重雖知誦讀其